

त्रेहाया
खीर
अक्ल

डोआरी
नींदा
समस्या

पानी
कैकर
जुगत

फामां
घड़ा
अगें-पिच्छें

इक बारी त्रेहाया कां,
सोचै कि'यां त्रेह मटां।
इद्धर-उद्धर भारी डोआरी,
अगें-पिच्छें नजर बी मारी।



नेई लब्भा पानी दा नां,
सोचै हून में कु'त्थै जां।
उडुरी-उडुरी होआ फामां,
खीर इक थां बैठा फही छामां।

नजर उत्थै घड़े पर पेई,
सोचै जाइयै दिक्खां सेही।
दिक्खेआ पानी बड़ा हा नींदा,
इस करी ओह कि'यां पींदा?



रंग भामें ऐ कां दा काला,
होंदा ऐ पर अकली आह्ला।
समस्या दी तैह तक पुज्जी,
जुगत उसी फही इक ही सुज्झी।



निक्के-निक्के कैंकर चुक्के,
घड़े च बारी-बारी सु'ट्टे।
पानी उप्पर आया पुज्जी,
पीऐ पानी गेआ ओह उड्डी॥

अभ्यास

1. हेठ दित्ते दे सुआलें दे जवाब लिखो :-
 (क) कां कैहदी तपाशा च उड्डरा दा हा?
 (ख) 'कां अकली आह्ला हा', कवि दे इस कथन दी पुश्टी करो।
 (ग) कां गी केह जुगत सुज्झी ही?

उद्देश्य : पाठै दा चेता दर्हाना।

2. कविता चा इक्कै नेह सुरें आह्ले शब्दें गी लिखो :-
 जि'यां :- 'डोआरी, मारी'
 (क) कां
 (ख) फामां
 (ग) पेई

(घ) नींदा

(ङ) काला

उद्देश्य : सुर-ज्ञान दा अभ्यास।

3. हेठ दिक्ती दियें पंगतियें गी उं'दी तुकबंदी आहली दूई पंगती जोड़दे होई पूरा करो :-

जि'यां :- इक बारी त्रेहाया कां
सोचै कि'यां त्रेह मटांऽ

(क) उडुरी-उडुरी होआ फामां,

.....

(ख) दिक्खेआ पानी बड़ा हा नींदा,

..... ।

उद्देश्य : विशे-ज्ञान ते स्मरण-शक्ति दा विकास।

4. पढ़ो, समझो ते लिखो :-

(क) दिक्खना दिक्खेआ

.....

पीना पीता

.....

सोचना सोचेआ

.....

उडुना उडुआ

.....

(ख) इब्दर अगें

.....

पिच्छें कु'त्थै

.....

दिक्खना पुज्जना

.....

सु'ट्टना उड्डना

.....

उद्देश्य : (i) क्रियाएं दी काल-रचना दा बोध कराना।

(ii) पढ़ने, उच्चरने ते लिखने दा अभ्यास।

5. श्रुतलेख :-

पानी, कु'त्थै, आह्ला, ओह, लब्भा,
कैंकर, घड़ा, त्रेहाया, मटांऽ, उप्पर

उद्देश्य : सुनियै स्हेई लिखने दा अभ्यास।

6. हेठ दित्ते दे शब्दें दे वाक्य बनाओ :-

त्रेह

पानी

घड़ा

कां

रंग

काला

अकल

निक्का

कैंकर

उड्डेआ

उद्देश्य : वाक्य-रचना दा अभ्यास।

अध्यापकें आस्तै निर्देश

इस पाठ च त्रेहाया, फामां, नींदा, काला बगैरा विशेषन शब्द बरतोए दे न। अध्यापकें गी चाहिदा ऐ जे ओह् विद्यार्थियें गी 'विशेषन' दे बारे च जानकारी देन ते होर उदाहरण देइयै उं'दी जानकारी गी बधान।